

DISSERTATIO IVRIDICA INAVGVRALIS  
DE  
**LEGATO DOTIS  
CONSTITVENDAE**

---

QVAM  
ILLVSTRIS ICTORVM ORDINIS CONSENSV  
PRAESIDE

~~VIRO CONSVLTISSIMO ATQVE EXCELLENTISSIMO~~

**DN. DANIELE NETTELBLADT**

POT. BOR. REGI A CONSILIIS AVLICIS ET PROFESSORE IVRIS  
ORDINARIO

PRO OBTINENDIS SVMMIS IN IVRE HONORIBVS

*D. II. OCTOBR, MDCCL.*

PLACIDO ERVDITORVM EXAMINI SVBMITTIT

AVCTOR ET RESPONDENS

**IOHANNES à RAESFELD**

BREMA-SAXO.

---

HALAE MAGDEBVRGICAE

TYPIS IOANNIS CHRISTIANI HILLIGERI, ACAD. TYPOGR.





SPLENDIDISSIMO ET AMPLISSIMO

INCLYTAE

S. R. G. I. LIBERAE

REIPUBLICAE BREMENSIS

SENATVI,

VIRIS

*ILLVSTRIBVS, PER QVAM MAGNIFICIS, EXCELLENTISSI-  
MIS, PRAENOBILISSIMIS, CONSVLTISSIMIS, GRA-  
VISSIMIS,*

DOMINIS

CONSVLIBVS,

DOMINIS

SYNDICIS,

DOMINIS

SENATORIBVS,

PATRIAE PATRIBVS

MERITISSIMIS,

LIBERTATIS AC SALVTIS PVBLICAE

CONSERVATORIBVS,

**DOMINIS SVIS ATQVE FAVORIBVS,  
PER OMNEM AETATEM  
DEVENERANDIS, COLENDIS,  
DISSERTATIONEM HANCCE INAUGVRALEM  
EA, QVA PAR EST, VENERATIONE  
ATQVE OBSERVANTIA  
OFFERT**

**AVCTOR.**

**CON-**



## CONSPECTVS DISSERTATIONIS.

- |  |  |
|--|--|
| §. I. <i>Instituti ratio datur.</i>  | §. XII. <i>An et quando modo in sit<br/>tacita conditio.</i>   |
| §. II. <i>De nomine legati dotis con-<br/>stituendae.</i>                                    | §. XIII. <i>Omne legatum dotis con-<br/>stituendae esse modale eui-<br/>citur.</i>                                 |
| §. III. <i>Definitio legati dotis con-<br/>stituendae.</i>                                   | §. XIV. <i>Modus qui inest legato<br/>dotis constituendae simul in<br/>favorem tertii tendit.</i>                  |
| §. IV. <i>Summa dicendorum.</i>  | §. XV. <i>De quaestione: an lega-<br/>tum dotis constituendae sit le-<br/>gatum conditionale? in ge-<br/>nere.</i> |
| §. V. <i>Quis dotem legare possit.</i>   | §. XVI. <i>Status controuersiae<br/>formatur.</i>  |
| §. VI. <i>Cui dos legari possit in ge-<br/>nere.</i>   | §. XVII. <i>Argumentum eorum,<br/>qui hanc quaestionem affir-<br/>mant, examinatur.</i>                            |
| §. VII. <i>An in specie tam solutae,<br/>quam coniugatae personae dos<br/>legari possit.</i> | §. XVIII. <i>Ad LL. ad quas pro-<br/>uocant affirmantes, responde-<br/>tur, et quidem ad Nov. 123.<br/>c. 37.</i>  |
| §. VIII. <i>Quis legato dotis con-<br/>stituendae grauari possit.</i>                        |  |
| §. IX. <i>Quid ita legari possit, ut<br/>dos fiat.</i>                                       |  |
| §. X. <i>De natura et indole legati<br/>dotis constituendae in genere.</i>                   |  |
| §. XI. <i>Modus legatis adscriptus<br/>quid sit, et an differat a con-<br/>ditione.</i>      |  |

§. XIX.

# CONSPECTVS.

- |  |   |
|--|---|
| <p>§. XIX. Porro ad L. 71. §. 3. ff. de cond. et demonstr.</p> <p>§. XX. Nec non ad L. 21. §. 1. 68. ff. de iure dotium.</p> <p>§. XXI. Legatum dotis constituendae per se non esse conditionale, sed purum, probatur.</p> <p>§. XXII. De quaestione: an legatum dotis constituendae sit legatum ad pias causas?</p> <p>§. XXIII. An sit legatum alimentorum?</p> <p>§. XXIV. De acquisitione legati dotis constituendae.</p> <p>§. XXV. De transmissione eius in heredes.</p> <p>§. XXVI. De iure accrescendi in legato dotis constituendae.</p> <p>§. XXVII. De iuribus et obligationibus, quae ex legato dotis constituendae oriuntur in genere.</p> <p>§. XXVIII. De tempore quo legatarius hoc legatum petere possit.</p> <p>§. XXIX. De obligatione legatarii modum, qui inest legato dotis constituendae, implendi.</p> | <p>§. XXX. Quid iustum sit implemento modi non sequuto.</p> <p>§. XXXI. De cautione a legatario praestanda propter modi implementum.</p> <p>§. XXXII. De iuribus et obligationibus legato dotis constituendae grauati in genere.</p> <p>§. XXXIII. An legatum dotis constituendae Falcidia subiacet?</p> <p>§. XXXIV. De legato dotis constituendae cum debito dotis compensando.</p> <p>§. XXXV. De iuribus et obligationibus tertii circa legatum dotis constituendae in genere, et in specie coniugis legatarii: nec non</p> <p>§. XXXVI. coheredis quoad collationem, si dos a patre praelegata est.</p> <p>§. XXXVII. De amissione legati dotis constituendae.</p> <p>§. XXXVIII. De differentia inter legatum ad apparatus et instructum muliebrem, et legatum dotis constituendae.</p> |
|--|---|

DISSER-



DISSERTATIO INAVGVRALIS IVRIDICA  
DE  
LEGATO DOTIS  
CONSTITVENDAE.



§. I.

Magnam esse inter legatum dotis et dotem praelegatam differentiam, omnes vno ore fatentur DD. ad tit. ff. *de dote praelegata*. Prout vero in ipso Pandectarum allegato titulo non nisi de dote praelegata agitur: ita et doctores, dum ad huncce titulum commentantur, de hac tantum specie praecipue agere solent, et paucis tantum delibare ac quasi in transitu commemo-

A

memo-

memorare legatum dotis. Quumque praeterea nemo, quantum ego quidem scio, ex instituto de hac legati specie scripserit, decreui, loco speciminis iam exhibendi inauguralis, huius legati naturam et indolem, pro virium mearum modulo, explicare. Faxit Deus feliciter.

## §. II.

Vt autem tota tractatio certis et indubitatis superstruatur principiis, ante omnia de accurata huius legati, de quo agendum, definitione ero sollicitus, praemissis paucis nomen ipsum concernentibus. Quod itaque attinet ipsum huius legati nomen, plerumque quidem illud simpliciter absque ullo addito solet appellari *legatum dotis*, et sub hoc nomine a dote praelegata distingui: sunt tamen, qui legatum, quod vulgo simpliciter legati dotis nomine venit, *legatum dotis constituendae*, et id, quod vulgo praelegatum dotis dicitur, *legatum dotis restituendae* appellant. Vid. BOENIGK in *Digestis* *civ. Rom. Lib. III. tit. XVII. SCHILTER in Exercit. ad ff. Ex. XXXIX. §. LXXV.* Et cum, si dicendum quod res est, negari nequeat, haec nomina magis apta esse, praetereaue et Conf. DN. PRAESIDI



SIDI placuerit his nominibus vti in *System. element. vniuersae iurispr. positivae Tom. II. §. 212.* et ego nullus dubitavi, legatum, de quo ago, legati dotis constituendae nomine insignire.

## §. III.

Sed missis vocabulis, rerum tantummodo signis, ad rem ipsam per accuratam definitionem explicandam, me iam accingo. Ne vero in re tam periculosa, qualis est, vt aiunt, definire in iure, proprio sensu abundare velle videar, ante omnia tentabo, an non ab aliis iam traditam definitionem meam facere liceat. Quamvis vero plerique in compendiis et commentariis occasione tituli de dote praelegata, legati dotis mentionem iniicere soleant, pauci tamen, quod miror, hoc legatum definiunt. Inter eos autem, qui officia interpretis hic implent, sunt WESTENBERG in *principiis iuris secundum ordinem ff. ad tit. ff. de dote praelegata §. 7.* cui legatum dotis est, *si non maritus uxori, sed alius aliquis virgini vel viduae, certam quantitatem dotis nomine reliquit*: SCHAVMBVRG in *compendio iuris digefforum cit. tit. §. 1.* qui legatum dotis appellat, *si alius quam maritus inuuptae dotem legato constituit*:

A 2

BOEH-

BOEHMERVS in *ff. cit. tit. §. 3.* cui legatum dotis est, *quo virgini loco futurae dotis aliquid relinquatur*: HEINECCIUS in *ff. cit. loc. P. V. §. 144.* cui placuit haec definitio, *quod sit legatum tale, quo non maritus, sed alius quicumque legat virgini vel viduae dotem.* Ast omnes hae definitiones, quod pace tantorum Virorum dixerim, non satis accuratae mihi videntur esse: cum quis hoc legatum relinquat, an is sit maritus, vel alius; vt et cui hoc relinquendum, an sit innupta, vel nupta persona, nihil interfit, prout ex infra dicendis patebit. Quae cum ita sint, ea definitio demum erit accurata, quae haec non determinat, et accuratam tamen differentiam specificam inter hoc legatum et alia legata continet, qualis, vt mihi quidem videtur, est Conf. DN. PRAESIDIS in *Syst. elem. vniu. iur. posit. Tom. II. §. 212.* data definitio, qui docet, *si aliquid legatur eo fine, vt dos fiat*, id legatum dotis constituendae appellari.

#### §. IV.

Quum itaque de hocce legato dotis constituendae iam agendum, vt omnia, quae de illo dicenda sunt, eo ordine tradam, vt praemittantur, quae sequentibus intelligendis et demonstrandis inferuiunt, tota

ta haec tractatio ad sequentia summa capita redibit: 1) *Quis dotem legare possit*; 2) *Cui dos legari possit*; 3) *Quis legato dotis constituendae gravari possit*; 4) *Quid ita legari possit ut dos fiat*; 5) *De legati dotis constituendae natura et indole*; 6) *De acquisitione huius legati*; 7) *De iuribus et obligationibus quae ex hoc legato oriuntur*; et tandem 8) *De amissione huius legati*.

## §. V.

Dotem legare posse quemlibet, qui in genere potest legare, ego ~~quidem defendere~~ nullus dubito: etsi DD. soleant excipere maritum, quasi is vxori suae legatum dotis constituendae relinquere nequeat. In eo enim solent praecipuam inter legatum dotis restituendae et constituendae differentiam ponere, quod prioris generis legatum maritus relinquat, posterioris vero generis alius quam maritus. Etsi vero certissimum sit, legatum dotis restituendae nullum alium, quam maritum vxori suae, relinquere posse, cur tamen nec idem etiam vxori suae legatum dotis constituendae relinquere possit, non video. Quod enim in genere maritus vxori aliquid legare possit, nemo

vnquam dubitauit. Si itaque maritus, qui et in specie dotem relegare seu praelegare potest vxori, non posset ei dotem legare, specialis adesse deberet ratio, quam ego quidem non perspicio. Quod si vero quis obicere vellet, hoc per rerum naturam, sicque physice, impossibile esse, cum hoc legatum futuras supponat nuptias: hoc ne quidem, uti ex sequentibus patebit, in genere verum est, nec, si verum esset, obstaret, quo minus maritus ita legare posset. Omnino enim tale legatum respicit futuras, nimirum secundas, vxoris nuptias, ut per se patet; quum eas, in quibus iam cum suo marito vivit, respicere nequeat. Ut vero clarius pateat, omnino maritum ita legare posse, ponamus sequentem casum: Titius sibi Seiam, puellam egenam et dote destitutam, matrimonio iungit. Quod si iam Titius maritus mox post initum matrimonium in mortis periculo constitutus testamentum conderet, simulque tanto erga vxorem flagraret amore, ut optaret, eam post mortem suam mox commodam secunda vice nubendi occasionem inuenire, nec tamen ei simpliciter aliquid vellet legare, sed potius ita, ut dos fiat, quod legat: quid, quaeso, obstaret, quo minus legatum tale subsisteret?

steret? Certe ideo, quod maritus hoc legatum reliquerit, pro inualido haberi nequit. Et si itaque nullus dubitem, hoc legatum valere: facile tamen largior, casum, quo maritus hocce suo utitur iure, esse rarissimum, nec facile in foro obuenire eum; cum mariti plerumque optare soleant, ut uxores in viduitate permaneant, sicque non facile quemquam hocce remedio, ut uxor vidua facta facilius iterum nubere possit, esse usurum. Ut taceam, ad hunc finem obtinendum sufficere, ut maritus in genere uxori aliquid leget, aut testamento illam heredem instituat. Hinc etiam de hoc casu plura addere noto.

## §. VI.

Prout vero quilibet, qui in genere legare potest, dotem quoque legare potest: ita etiam cuiuslibet, cui in genere aliquid legari potest, et dos legari potest, siue mas sit, siue femina. Scio quidem dotem maritalem veterum Germanorum non amplius esse in usu, sed potius hodie omnem dotem esse muliebrem: eo tamen non obstante defendi posse credo, etiam mari dotem legari, seu legatum dotis relinqui posse. Ne vero tota controversia

versia tandem in logomachiam abeat , ante omnia determinandum , quis sit ille , cui aliquid legatur. Vt enim dici possit alicui legari aliquid non sufficere arbitror, legatum tendere in eius utilitatem, sed potius ei aliquid legari dicendum est, cui is, qui legato oneratur, id, quod legatur, praestare debet , siue legatum in eius tantum cui legatur, siue simul in alterius commodum tendat. Quare quamvis non mas, sed femina dotem inferat; tamen mari aliquid legari potest vt dos fiat, sic legatum dotis constituendae relinqui ; et sufficit marem posse finem implere remque legatam vt dotem habere. Miror itaque , doctores hoc legatum sine omni ratione ad feminas restringere, et eo magis miror, quum *l. 71. §. 3. ff. de cond. et dem.* quae est sedes huius speciei legatorum, expresse de dote mari relicta loquatur, verbis: *Titio, genero meo, heres meus dotis Seiae filiae meae nomine centum dato: Legati quidem emolumentum ad Seiam, quae dotem habere incipit, pertinebit; sed quia non tantum mulieri, sed Titio quoque, cui pecuniam legavit, consultum videtur, prope est, vt ipse legatarius intelligatur et legatum petere debeat.* Speciem hic propositam legatum dotis constituendae sistere nemo

nemo negabit. Titio vero, non filiae Seiae, hoc legatum relictum esse inde patet, quod expresse dicatur: *Titio genero meo heres meus centum dato*, et distinguatur inter eum ad quem emolumentum ex hoc legato pertinet, pro quo tam Titius, quam Seia habentur, et eum, cui relictum legatum, quem Titium esse indicant verba: *Titio pecuniam esse legatam, et prope esse ipsum legatarium intelligi*. Et si enim verba: *prope est*, eum videantur habere sensum, quod reuera Titius non sit legatarius, sed potius in dubio relictum esse videatur, an pro legatario sit habendus: ~~constat tamen~~, particulam: *prope*, affirmare et definire, licet dubitationis speciem habeat. Vid. *L. 95. §. pen. ff. de solut. L. 5. §. 6. ff. de re militari*. BRISSONIVS de *V. S.* sub voce: *prope*. STRAVCH. *Lexicon partic. iur. sub hac voce*.

## §. VII.

Quaeritur vero: *An legatum dotis constituendae tam solutae quam coniugatae personae relinqui possit?* Nescio iterum ex qua ratione hic plerumque DD. defendant, quod non nisi virgini hoc legatum relinqui possit: cum tamen nil obstat, quo minus et viduae, immo feminae in coniugio viventi, re-

B

linqui

linqui possit: ut itaque ad quaestionem propositam respondendum esse censeam, in genere cuilibet mari et cuilibet feminae, siue in matrimonio uiuant, siue non, dotem legari posse. Quod enim legatur, ut dos fiat, non solum tum dotem fieri posse, si legatarius adhuc extra matrimonium uiuit, sed et tum si iam in illo uiuit, nemo dubitabit. Si vero in utroque hoc casu id, quod legatur, dos fieri potest, cur non in utroque hoc casu etiam legari aliquid possit ita, et eo fine, ut dos fiat. Confirmat me in hac sententia, quod L. 71. §. praec. iam allegata, expresse loquitur de casu, quo marito dos legata est. Nec puto hic distinguendum esse, an vxor cui legatur dos iam sit dotata, an vero non. Sit enim licet dotata, dos tamen admittit augmentum.

#### §. VIII.

Postquam iam de personis, quae possunt legare dotem, et de iis, quibus dos legari potest, quantum sufficit actum: iam etiam de iis, qui legato hoc possunt onerari, erit agendum. Quum vero nulla adsit specialis ratio, nec specialis legum prohibitio, hanc tantum legati speciem concernens: omnes, qui in genere legatis grauari possunt,

sunt,



sunt, et hoc legato grauari possunt. Non solum itaque heredi ipsi, sed et legatario, imo et donatario huius legati praestatio potest iniungi. Hos enim esse, qui in genere legatis grauari possunt, in vulgus notum est.

§. IX.

Quod attinet res, quae ita legari possunt, ut dos fiant, nemo dubitabit, quin iterum in genere omnes res, quae in dotem dari et legari possunt, per legatum dotis constituendae quoque legari queant. ~~Nulla enim adest specialis legum dispositio~~ hanc vel illam rerum speciem eximens, nec vlla ex huius legati natura fluit differentia.

§. X.

His praemissis iam natura et indoles legati dotis constituendae erit explicanda, ut ea explicata, quae inde oriuntur iura et obligationes facilius demonstrari possint. Quatuor vero maxime necessariae quaestiones hic sunt pertractandae, quarum prima est: *An legatum dotis constituendae sit legatum sub modo relictum?* Secunda: *An sit legatum conditionale?* Tertia: *An sit legatum ad pias cau-*

*fas ? Quarta : An sit species legati alimentorum, vel ad minimum a legato alimentorum ad legatum dotis constituendae argumentari liceat ?*

### §. XI.

Priusquam ad primam quaestionem responderi potest, necesse est, generalia quaedam de modo legis adscripto hic praemittere. Modi vocabulum varios habere significatus inter omnes constat, suntque ii iam ab aliis, qui verborum in iure significationem sibi excutiendam sumserunt, veluti SCHARDIO, BRISSONIO, CALVINO indicati et explicati. Hic de modi significatu agendum, sub quo in doctrina de legatis venit, ubi modus est causa finalis, quae respicitur a testatore, dum legat, uti recte modum definit V.C. WURFFEL *in Iurispr. civili definitiva* §. 580. Sed nec ii sunt reprehendendi, qui modum definiunt, quod sit *adiectio quaedam, quae indicat, quid legatarius, accepto legato, ex defuncti voluntate facere, vel non facere debeat.* Ex hac modi definitione vero statim patet, non esse admittendam FABRI *in Cod. l. 6. T. 22. def. 2.* et CARPZOVII *P. III. C. 13. def. 20. n. 10. et def. 26. n. 4.* sententiam, in contrariis

etibus quidem, non autem in ultimis voluntatibus, inter modum et conditionem aliquid discriminis intercedere. Prouocant ad *L. 1. Cod. de his quae sub modo*, in qua expresse dicitur: *in legatis et fideicommissis modum pro conditione obseruari*. Quamuis vero negari nequeat, primo intuitu videri, verba huius legis generalia huic opinioni fauere: tota tamen lege penitius inspecta patet, ex hac lege eam probari non posse. Non enim dicit Imperator ANTONINVS in dicta lege, nullam plane esse inter modum et conditionem differentiam, sed tantum, ~~modum~~ pro conditione obseruari, hoc est, prout conditio implenda, ita et modum esse implendum. Quum enim casus ibi decifus respiciat quaestionem de implendi modum adiectum obligatione, et casus ita decifus, quod, etsi modus in dato casu non esset impletus, tamen legataria legatum obtinere debeat: tanquam ratio dubitandi praemittuntur verba: *in legatis quidem et fideicommissis modus adscriptus pro conditione obseruatur*. Conf. BERGER *in Oeconom. Iur. L. 2. T. 4. §. 28*. ECKHOLD *ad ff. tit. de cond. et demonstr. §. 6*. Hinc etiam SCAEVOLA *in L. 80. ff. de cond. et dem.* inquit: *Parem non dicimus eum, cui ita da-*

tum est, si monumentum fecerit; et eum, cui datum est, ut monumentum faciat.

### §. XII

Et si itaque modus cum conditione in ultimis voluntatibus non sit exaequatus: tacitam tamen modus conditionem continere potest. In usum sequentis itaque tractationis hic inquirendum est; *an et quando tacita modo insit conditio.* Constat inter omnes conditionem dici tacitam, si sine speciali adiectione, ex natura ipsius negotii, subintelligitur. Si itaque omni modo tacita inesset conditio, ex natura modi demonstrari posse necesse esset, modo posito, poni eo ipso conditionem: quod quidem nec simpliciter negare, nec tamen etiam simpliciter affirmare possum. Distinguendum potius est inter *modum ipsum* et *implementum modi*, ita ut modus ipse quidem nunquam conditionem tacitam contineat, implementum modi vero toties, quoties modus impleri nequit, nisi aliud quid existat, a cuius existentia dependet, modum impleri posse, conditionem tacitam: *si id existat*, contineat. Ex. gr. Si Titio centum lego, ut hanc pecuniam in solutione pretii horti emti impendat, legato adiectus

ctus est modus: ipsi vero huic modo tacita non inest conditio, licet quoad implementum tacita conditio: *si hortum emerit*, insit. Vt enim Titius modum implere, et sic pecuniam legatam in solutionem pretii pro horto emto impendere possit, necesse est eum emere, hinc itaque tacita conditio: si hortum emerit, huic legato inest, quae vero vnice modi implementum respicit. Si vero Titio do lego centum, vt vitae curriculum describat, nec ipsi modo tacita conditio inest, nec implementum a conditionis tacitae existentia dependet. Etsi vero non ~~omni modo inest~~ conditio tacita: nihil tamen obstat, quo minus eidem dispositioni simul et conditio expressa et modus adiici possint. Sic ex. gr. promittere possum, me Titio, si naus ex India redierit, viginti thaleros donare velle, vt nouam vestem sibi comparare possit, tumque simul tam modum, quam conditionem dispositioni adieci. Similiter, si testator dixisset: Lego Caiae centum, causa suae dotis, si nupserit Caio: hoc legatum simul modum et expressam conditionem contineret.

## §. XIII.

Si iam, quae in genere de modo legatis adscri-

adscripto dicta sunt, ad legatum dotis constituendae applicamus: facile patebit, omne legatum dotis constituendae esse legatum sub modo relictum. In legato dotis constituendae enim aliquid legatur eo fine, ut dos fiat: sicque testator, qui ita legat, legato adiicit causam finalem: quae cum modus dicatur, omnino omne legatum dotis constituendae est legatum modale. Hinc etiam in L. 71. ff. de cond. et demonstr. quae agit de legatis modalibus, praesertim hoc legatum explicatur. Modus ipse vero, qui inest legato dotis constituendae, omnino talis est, qui in casu, quo personae solutae legatum relictum, continet tacitam conditionem: *si nupserit*; cum dos sine nuptiis non intelligatur, sicque in hoc casu nuptiae adesse debeant, si modus implendus, et his positis circumstantiis modus semper tacitam conditionem inuoluat. *Vid. §. praec.*

#### §. XIV.

Quum vero, si, quid iustum est circa legata modalia, definiendum, multum intersit, an modus adiectus in fauorem tertii adiectus: inquirendum erit, antequam ulterius progredior, qualis sit is modus, quem legatum dotis constituendae continet.

net. Me iudice hicce modus talis est, vt tam in legatarii, quam in coniugis fauorem simul tendat. Quod in legatarii vtilitatem, siue mas sit, siue femina, tendat, facile patet. In maris enim vtilitatem redundare, si ei legatur aliquid adiecto modo, vt dos fiat, inde fluit, quod, licet dotis dominium naturale sit penes vxorem, ciuile tamen penes maritum sit: in feminae vero, si ei eodem modo aliquid legatur, vtilitatem etiam modum redundare, itidem ex eodem fluit fundamento. Quod vero legatum dotis constituendae ~~semper etiam in coniugis simul fauorem tendat,~~ ideo defendo, quoniam semper in coniugem legatarii redundat quaedam vtilitas ex hoc modo veniens. Si enim legatur dos mari, vxor eius vel praefens vel futura maximam exinde percipere vtilitatem per se patet: prout, si feminae legatur dos, in praesentem seu futurum maritum, propter iura mariti in bona dotalia vxoris, ex hoc modo adiecto quaedam redundat vtilitas. Confirmat hanc sententiam iam saepe excitata *L. 71. §. 3. ff. de cond. et dem.* in qua PAPINIANVS in casu, quo Titio genero dotis Seiae filiae nomine centum dare heredem testator voluit, legati quidem

C

emo-

emolumentum ad Seiam pertinere dicit, sed tamen addit, non tantum mulieri, sed Titio quoque consultum videri.

### §. XV.

Sufficiant haec de prima quaestione: An legatum dotis constituendae sit modale? Progredior itaque ad secundam (*Vid. §. X.*) in qua, an conditionale sit, inquirendum est. Antiquiores iuris civilis interpretes si consulimus, horum plerique hoc legatum pro puro habuerunt, ita, ut teste CASTRENSI in *L. 71. §. 3. ff. de cond. et demonstr.* ante BARTOLVM haec opinio fuerit opinio communis. Ipse BARTOLVS vero in *L. 71. §. 3. ff. de cond. et demonstr.* ab hac sententia recedit, et pro conditionali habet legatum pro dote relictum. Hunc plures sunt sequuti, quos larga manu porrigit MENOCHIVS de *praesumptionibus* *L. 4. Praef. 146.* qui ipse, varios casus ad nauseam usque distinguendo, huic argumento satisfacere voluit. Inter recentiores, quantum ego quidem scio, HEIGIVS in *Quaest. iur. Quaest. 31.* praesertim de hac quaestione ex instituto egit, qui itidem defendit, in regula omnino hocce legatum esse



esse conditionale, duas subnectens exceptiones: 1) si pater filiae dotem legat: 2) si post praecedentem dispositionem puram dotis, mentio iniiciatur. Idem sentiunt CARPZOV. *Def. for. P. 3. Const. 13. Def. 13.* STRVV. *Jurispr. Rom. Germ. For. L. 2. T. 24. §. 9.* hosque sequuntur recentiores DD. quos mihi quidem euoluere licuit, ad unum omnes.

### §. XVI.

Nec mirum, hac in re dissentire DD. quum omnino haec quaestio in vtramque partem disputabilis sit. Re tamen ~~accurate~~ ~~perpenſa~~, nullus dubito antiquiorum sententiam pro optima et veritati magis consentanea declarare. Defendo itaque, omne legatum dotis constituendae esse purum, nisi testator expresse conditionem adiecerit, veluti si dixerit: *Caiae lego centum dotis causa, si nupserit Caio.* Vt autem in hac controuersia componenda ordine procedam, placet primo fundamenta eorum examinare, qui contrariam defendunt sententiam, tumque meae sententiae probationem adponere. Quum dissidentes et argumentis et legibus pugnent, et meum erit, tam ad argumenta eorum, quam ad leges, ad quas prouocant, respondere.

## §. XVII.

Vnicum fere et praecipuum argumentum, quo vtuntur dissentientes, hoc est: *Omne legatum, quod continet conditionem, est conditionale. Atqui legatum dotis constituendae continet conditionem. Ergo legatum dotis constituendae est legatum conditionale.* Quod maiorem huius syllogismi propositionem attinet, ego quidem simpliciter eam pro vera assumere nequeo. Distinguendum enim esse censeo inter legatum, quod talem conditionem continet, a qua praestatio legati heredi vel alii iniuncta dependet; et inter legatum, quod continet quidem conditionem, ast non talem, a qua praestatio legati heredi vel alii iniuncta dependet. Quae quum ita sint limito maiorem ita: omne legatum, quod continet conditionem talem, a qua dependet praestatio legati heredi vel alii iniuncta, est legatum conditionale, et sub hac limitatione eam concedo. Iam itaque nego propositionem minorem, nec ea inde probari potest, quod omni legato dotis constituendae tacita insit conditio: si nupserit legatarius. Haec enim conditio non est talis, a qua suspensa est obligatio praestandi legatum, et quae afficit ipsam legati praestationem, sed potius

potius tantum respicit implementum modi legato adiecti. Ast tum demum legatum conditionale dici potest, si a conditione obligatio praestandi legatum suspensa est: non vero simpliciter, quoties legato inest conditio. Accedit quod PAPINIANVS in L. 99. ff. de cond. et demonstr. disertis verbis dicat: *Conditiones extrinsecus non ex testamento venientes, id est, quae tacite inesse videantur, non faciunt legata conditionalia.*

## §. XVIII.

Infirmato argumento, quo, uti solent dissentientes, iam ad leges, quae ob stare videntur, est respondendum. Prima earum est Nou. 123. c. 37. in qua IVSTINIANVM inter dispositiones conditionales ponere, si aliquid dotis causa legatum, ex ipsis verbis manifestum esse clamant. Est enim hic textus, quoad passum concernentem, his conceptus verbis: *Si quis sub conditione nuptiarum siue liberorum, siue antenuptialis donationis donauerit, siue reliquerit suis liberis, siue alii cuicumque personae hereditatem, siue legatum, aut ab initio pure relinquens eis, oneret eos substitutione, aut sub una praedictarum conditionum reliquerit, vel donauerit:*

etc. Putant itaque dissentientes, IVSTINIANVM, dum inquit: *aut sub una praedictarum conditionum*; antea vero etiam legati dotis causa mentionem fecerit, expresse satis dixisse, legatum dotis causa relictum esse conditionale. Nescio vero, an verba: *sub una praedictarum conditionum*, sufficiant ad euincendum per hunc textum, legatum dotis constituendae esse conditionale. Notandum enim 1) Imperatorem non exprimere, quibus verbis legatum relictum sit, sicque forsan eum praesupponere, quod testator usus fuerit verbis, ad significandum conditionem aptis; quum legatum dotis causa relictum conditionale esse posse, si nimirum expresse conditio adiecta, non negem. Porro vero 2) non expresse dixit IVSTINIANVS, conditionalem esse dispositionem, si legatum dotis causa relictum: sed tantum loquitur in genere de praedictis conditionibus, sicque non definire voluit, quae ex praedictis dispositionibus sint conditionales vel non, nec hoc definit; sed potius, postquam dispositiones sub conditione manifesto factas, veluti sub conditione nuptiarum, vel sub conditione liberorum, cum aliis, de quibus dubium est, an conditionales sint, in antecedentibus

tibus adduxit, addit in sequentibus, sub praedictis conditionibus. Non itaque affirmat, omnes praedictas dispositiones esse conditionatas, nec definit, quae conditionales sint vel non, quum potius praesupponat, de eo iam constare, quae conditionales sint. Vnde in hoc textu quaestio: An legatum dotis constituendae sit conditionale, vel purum? plane non decisa, sicque nec mea, nec contraria sententia ex eo probari potest.

## §. XIX.

~~Secunda lex, ad quam dissentientes prouocant, est L. 71. §. 3. ff. de condit. et demonstr.~~, quae agit de casu, quo socer genero Titio legauit centum dotis Seiae filiae nomine, et inter alia haec continet verba: *Ante nuptias Titio vel muliere defunctis, legatum apud heredem manet*, ex quibus colligunt, legatum hoc esse conditionale, conditionem: si nupsit, continens; et ideo apud heredem manere legatum, quoniam Titio vel muliere defunctis haec conditio non existit. Et si vero certissimum sit, non existente conditione, sub qua legatum conditionale relictum, illud apud heredem manere: non tamen exinde sequitur, toties, quoties legatum apud here-

heredem manet, nuptiis certis non sequutis, legatum esse conditionale, conditionem, si nupserit, continens. Aliae enim causae, praeter deficientem conditionem, hunc effectum producere possunt, et hic omnino ex longe alio fundamento legatum apud heredem manere, ex infra dicendis patebit.

### §. XX.

In subsidium porro dissentientes vocant leges, quae de promissione dotis agunt, veluti *L. 21. L. 41. L. 68. ff. de iure dotium*. Quum enim ex his legibus promissionem dotis conditionalem esse pateat, et idem de legato dotis causa relicto dicendum esse putant; idque eo magis, cum in *L. 21. ff. de V. O.* promissio dotis causa facta cum legato eandem ob causam facto comparetur. Prout vero in genere non semper tuto a contractibus ad ultimas voluntates argumentari licet: ita etiam dictae leges non nisi hoc probant, quod promissioni dotis tacita insit conditio: si nupserit, quam legato dotis constituendae inesse nec ego nego. Sed ideo legatum ipsum non esse conditionale, ex iis, quae iam §. XVII. dicta sunt, patet; cum conditio haec non praestationem

tionem legati, sed potius implementum modi legato adiecti afficiat.

§. \* XXI.

His praemissis ipsa, quam defendo, thesis, quod nimirum legatum dotis constituendae per se sit legatum purum, erit probanda. Non desunt argumenta, nec desunt leges, quibus haec thesis defendi potest. Ita enim argumentari licet. Si legatum dotis constituendae per se nihil continet, a quo praestatio huius legati suspensa: sequitur, quod per se non sit conditionale. ~~Atqui verum~~ est prius, legatum dotis constituendae per se nihil continere, a quo praestatio huius legati suspensa sit. Ergo etiam verum est posterius, quod nimirum legatum dotis constituendae per se non sit conditionale. Consequentiam maioris ex ipsa probo legati conditionalis definitione, de qua ex iis, quae §. XVII. iam dicta sunt, constat. Quod vero et prius verum sit, ex ipsa definitione legati dotis constituendae patet. Vid. §. III. Sed quid opus est argumentis, quum non desint clarae leges, quae probant quod probandum est. Et si enim *L. 4. ff. Vbi pupillus educari debeat*, ad quam nonnulli prouocant, hanc thesin non prober; quum

quum IVLIANVS ibi tantum narret casum, quo legatum dotis constituendae a patre filiae relictum, a filio herede instituto solum forori ante nuptias initas, non vero dicat, an male aut bene soluerit, sed solummodo soluisse, ex qua narratione non resultat legis dispositio, quod soluere debuerit, sicque nec ex hac lege probari possit, legatum esse purum: *L. 71. §. 3. ff. de condis. et dem.* tamen euincit satis, veram esse, quam defendo, sententiam. Expresse enim dicitur in hac lege, ante nuptias legatum genero, dotis filiae nomine, relictum peti posse, addita ratione: *quia purum legatum est.* Quum vero quoad quaestionem, an legatum dotis constituendae sit purum vel conditionale, perinde sit, an pater legatum hocce relinquat, siue alius; quod in proposito dictae legis casu, de legato dotis constituendae a patre relictum, dictum, etiam de legato dotis constituendae ab extraneo relictum valebit. Prout itaque ad hanc circumstantiam in casu, in citata lege deciso, quod pater hoc legatum reliquerit, non respiciendum: nec ceteras circumstantias, nimirum legatum esse relictum pro dote respectu certae personae, cum iam contracta sint sponsalia, hic attendendas esse credo, licet vul-



go DD. aliter sentiant, et ideo tantum in particulari hoc casu, quo pater intuitu certae personae post iam contracta sponsalia dotem legauit, hoc legatum purum esse admittant. Vid. EMANUEL COSTA *Lib. 2. select. interpretationum circa conditiones, Cap. 22. num. 6.* Quum enim hae circumstantiae in decisionem non influant, et nulla allegari possit ratio, cur, si legatum dotis constituendae post inita sponsalia relictum purum est, nec etiam hoc legatum, si ante inita sponsalia relictum est, pro puro habendum sit: prout etiam perinde est siue persona, cum qua nuptiae inuendae sunt, certa sit, siue adhuc incerta: nec lex allegata ad casum in ea propositum restringenda est, sed potius ad omnes casus similes extendenda, quales sunt omnes, in quibus legatum pro dote relictum.

## §. XXII.

Progredior ad tertiam quaestionem, ad quam respondendum, ut constat de legati dotis constituendae natura et indole: *An nimirum sit legatum ad pias causas relictum?* Breuibus ad hanc quaestionem respondendum esse arbitror distinguendo an pauperi, an vero diuiti legatario legatum relictum

lictum sit. In priori casu nullus defendere dubito, hoc legatum esse legatum ad pias causas; cum quoties dispositio quaedam in usum pauperum facta, ea dispositionibus ad pias causas sit adnumeranda. BOEHMER *in iure eccles. prot. Lib. III. Tit. XXVI. §. 12. seqq.* In posteriori vero casu erit quidem legatum fauorabile, cum omnes dotium causae tales sint, attamen pro vera ad pias causas legatorum specie illud habere nequeo. Et ita recte sentiunt WERNHER *Obs. For. Tom. I. Part. 1. Suppl. ad Obs. 21. num. 28.* MENOCHIVS *Conf. 1162. num. 7.* WESENBECIVS *Tom. III. Conf. 130. num. 71.*

### §. XXIII.

Restat quarta quaestio, ad quam hic etiam breuibus respondendum est: *an nimirum legatum dotis constituendae sit legati alimentorum species, vel ad minimum a legato alimentorum ad legatum dotis constituendae argumentari liceat?* Et respondeo, quod non. Licet enim noto notius sit, DD. saepissime ab alimentis argumentari ad dotem, veluti in materia de obligatione patris ad dotandum filias, vt et de dote ex feudo praestanda etc. non tamen

men ideo legatum dotis constituendae esse legatum alimentorum affirmare audeo, quum alimenta et dos ita differant, ut alimenta non sint genus, quod dotem tanquam speciem sub se continet. Sed nec defendere audeo argumentum ab alimentis ad dotem, quod neutiquam in genere reiiciendum est, hic procedere. Distinguendum enim est, an quaestio de dote proposita concernat dotandi obligationem, an vero non. Si prius, concedo, argumentum ab alimentis ad dotem valere, et sic ex. gr. vi *L. 5. §. 7. ff. de agnosc. liber.* in qua constitutum, filiam diuitem a patre non esse alendam, argumentum a negatione alimentorum ad negationem dotis procedit; cum casus de obligatione alimentandi, et casus de obligatione dotandi omnino sint similes, prout, si huius loci esset, facile demonstrari posset. Si vero posterius, nego ab alimentis ad dotem valere consequentiam; quum casus obligationem dotandi, et casus obligationem alimenta praestandi non concernentes, non sint similes.

#### §. XXIV.

Iam secundum legem ordinis, quam mihi ipsi §. IV. dixi, de acquisitione legati dotis con-

stituendae est agendum. Acquiritur vero legatum aut ipso iure, aut interueniente agnitione. Si enim testator pro dote certam speciem pure legauit, ipso iure, licet nondum facta sit agnitio, dominium rei legatae in legatarium transit, secundum satis notam *L. 80. ff. de leg. 2. Conf. SCHNEIDERI Diss. de dominio rei legatae ipso iure transeunte*. Nec obstat hoc legatum esse modale, cum modus non impediat, quo minus rei legatae dominium a morte testatoris ad legatarium transeat. *MENCKE in Diss. de modo legatis adscripto §. 5.* Hincque patet multum interesse an legatum dotis constituendae sit sua natura conditionale, vel non. Si enim conditionale esset, nunquam dominium rei legatae ipso iure in legatarium transfret. Quodsi vero legatum dotis constituendae non ita pure relictum, ut species testatori propria legata, nec illud etiam ipso iure, sed potius per interuenientem demum agnitionem, legatarium acquirere tralatitium est.

#### §. XXV.

Ex his quae in §. *praec.* de acquisitione huius legati dicta sunt, quid circa transmissionem huius

huius legati in heredes legatarii, ut et ius accrescendi quoad hoc legatum iustum sit, definiendum est. Hic de transmissione; de iure accrescendi vero in §. *seq.* agendum erit. Constat inter omnes, legatum, quod sub expressa conditione relictum est, si legatarium ante impletam conditionem mori contingat, ad heredem non transmitti. Constat etiam porro quod, si conditio tacita inest legato, ea non impediatur transmissionem, licet exprimatur, nisi testator id voluerit. Nec minus notum est, modum legato adiectum non ~~impedire legati transmissionem in heredem legatarii ante impletum modum;~~ hac tamen addita limitatione, uti iam recte observavit B. BOEHMERVS in *Intr. in ius Digest.* L. XXXV. Tit. I. §. 7. si modus ita comparatus est, ut etiam a legatarii herede impleri possit. Ex quibus iuris principiis quaestio proposita iam erit definienda. Hoc itaque ut distincte fiat, sequentes facio adfertiones. I) Si testator expresse adiecit legato dotis constituendae conditionem: si nupserit, et legatarius antequam nupserit mortuus est, legatum non transmittitur ad heredes legatarii, sed potius tum illud hereditati accrescit. II) Si legato dotis constituendae

dae nulla conditio expressa adiecta est, mortuo ante implementum legatario, tamen legatum non ad heredes transmittitur, sed potius et in hoc casu legatum accrescit hereditati. Prius inde facile patet, quoniam tum legatum est conditionale. Licet vero in posteriori casu legatum non sit conditionale: ideo tamen ad heredes non transmittitur, quoniam modus, qui huic legato inest, ita comparatus est, ut a legatarii herede impleri nequeat. Quamvis enim omnino legatarii heredes etiam nubere, et sic, quod legatum est, dos fieri possit: tamen modus a testatore adiectus ideo non est impletus. Voluit enim testator legatarii, non eius heredum, dotem fieri, quod legavit. Confirmat, quae dicta sunt, et ex principiis fluunt, *L. 17. §. 3. ff. de cond. et dem. verbis: ante nuptias vero Titio vel muliere defunctis legatum apud heredem manet.* Quae cum ita sint, nec admittere possum limitationem huius propositionis, quam adiecit STRVVIVS in iurispr. *Rom. Germ. For. Lib. 2. Tit. 24. §. 9.* qui docet: si legatarius, antequam nuptias contraxerit, decedat, legatum extinguí, et hereditati accrescere; praeterquam in filia, cui pater dotis legatum reliquit, quod liberorum fauore, ex tacita voluntatis coniectura,

Etura pro pure et ad heredes transmissibili habetur, quasi pro legitima sit relictum. Deest enim huius limitationis probatio, nec sufficit dixisse STRVIVM.

## §. XXVI.

Licet vero legatum dotis constituendae non transmittatur ad heredes, si ante modum impletum moritur legatarius: iuri accrescendi tamen locus est, si pluribus legatum dotis constituendae ita relictum, ut sint legatarii coniuncti et unus vel alter deficit; veluti si testator dixerit: lego mille filiabus meis pro earum dotibus. Si vero pluribus quidem legatum dotis relictum, sed sine omni coniunctione; veluti quando testator dixit: filiabus pro dotibus lego aureos mille pro qualibet earum, constat ius accrescendi. Constat enim in legatis sine coniunctione relictis ius accrescendi locum habere non posse *L. 2. §. fin. ff. quibus mod. usufr.* E contra vero iuri accrescendi locum esse, ubi coniunctio reperitur, nec tamen specialis legum prohibitio adest; veluti in legato alimentorum *L. 57. §. 1. ff. de usufructu*. Quum vero quoad legatum dotis constituendae nulla adsit specialis legum prohibitio, vi cuius in eo ius accrescendi locum habere neque-

E

at;

at; nec illud, si pluribus legatum dotis constituendae ita relictum, ut sint collegatarii, cessare potest. ME-  
NOCHIVS *de praesumptionibus Lib. IV. Praef. v49.*  
Quae cum ita sint, non metuo objectionem: ideo hic cessare ius accrescendi, quoniam dos in filiabusfamilias vicem alimentorum sustinet, sicque legatum dotis constituendae sit, ad minimum si a patre relictum, species legati alimentorum; et per consequens, prout in omni legato alimentorum, ita etiam in hac specie legati alimentorum ius accrescendi locum habere non posse. Nego enim principium, ex quo, si verum esset, fluere omnino haec conclusio. Nego nimirum legatum dotis constituendae legati alimentorum speciem esse. §. XXIII.

## §. XXVII.

Acquisito itaque, dicto modo, dotis constituendae legato, ex eo oriuntur iura et obligationes, de quibus iam est agendum. Sunt vero iura et obligationes, quae ex hoc legato oriuntur, vel iura et obligationes *legatarii*: vel iura et obligationes *heredis*, seu *alii* hoc legato grauati: vel iura et obligationes *tertii*. De singulis his iuribus et obligationibus itaque sigillatim in sequentibus agendum erit,

## §. XXVIII.



## §. XXVIII.

Vt itaque a iuribus et obligationibus legatarii, cui legatum dotis constituendae relictum, initium faciam; primum idque praecipuum ius legatarii est, quod possit statim acquisito hoc legato illud petere, nisi conditio: si nupserit, aut alia quaedam legato sit adiecta. Cum enim legatum dotis constituendae non sit conditionale, nisi conditio quaedam expresse adiecta, et licet modale sit, modus tamen non suspendat obligationem eius, qui legato modali grauatus est: porro secundum *L. 12. pr. ff. de legatis 1.* omnia quae testamentis sine die et conditione adscribuntur, ex die aditae hereditatis praestari debent: quin et legatarius, cui legatum dotis constituendae relictum, statim petere possit legatum, si nulla conditio expresse adiecta, dubio caret. Quod vero, si conditio quaedam, veluti, si nupserit, aut alia adiecta sit, euentus expectandus sit, ex natura legatorum conditionalium per se patet. Oritur vero hic quaestio: *quando conditio, si nupserit legatarius, pro impleta habenda, et per consequens ipsum legatum legatario sit soluendum: an nimirum sufficiat sponsalia esse contracta, an vero requiratur nuptias esse consummatas?* Sola sponsalia non sufficere credo,

do; cum quaelibet conditio specificè sit implenda: id quod sponfalibus quidem initis, sed nuptiis ipsis tamen nondum consummatis, nondum factum. Confirmat hanc sententiam *L. 15. ff. de cond. et dem.* in qua VLPIANVS ait: *Cui fuerit sub hac conditione legatum, si in familia nupsisset: videtur impleta conditio statim atque ducta est vxor, quamvis nondum in cubiculum mariti venerit.* Vt enim conditio pro impleta haberi possit VLPIANVS requirit, *ductam esse vxorem*, sicque sola sponsalia non sufficiunt. Ducta autem vxore, licet nondum accessisset copula carnalis, iam erat ea vxor secundum ius Romanorum, *L. 5. 6. 7. ff. de R. N. L. 6. Cod. de donat. ante nuptias.* Conf. ZOLL in *diff. ad L. 30. ff. de R. I.* An vero etiam secundum ius Germ. et praxin hodiernam, quamdiu copula carnalis non sequuta, sponsa iam sit vxor, alia quaestio est, ad quam respondere non est huius loci. Legatur tamen de hoc themate elegans *diff. V. C. DREYERI de termino effectuum civilium matrimonii a quo.*

#### §. XXIX.

Quod si itaque legatario petiturum legatum sortum, is obligatus est ad modum implendum, qui huic legato inest, sicque in dotem conuertendum quod

quod legatum est, et quidem statim, si hoc legatum tali relictum, qui iam in matrimonio viuit, ex interuallo vero, nimirum nuptiis initis, si legatarius adhuc extra matrimonium viuit. Licet enim DD. quoad obligationem legatarii, cui legatum modale relictum, modum adscriptum implendi, distinguere soleant inter modum, qui tantum in fauorem legatarii adiectus, et qui talis non est, ita ut in priori casu modus non necessario implendus sit, sed pro nudo saltem consilio habendus sit, quod legatarium nulla ratione obliget: ~~hic modus tamen~~, qui legato dotis constituendae inest, est implendus, cum ex superioribus §. XIV. iam constet, eum non tantum in fauorem legatarii, sed et simul in fauorem tertii tendere.

## §. XXX.

Ex hac legatarii, cui legatum dotis constituendae relictum, obligatione modum adiectum implendi, fluit noua obligatio legataris, quae est obligatio restituendi legatum implemento modi non sequuto. Vt vero haec obligatio rite determinetur, distinguendum est, an casu fiat modum impleri non posse, an vero non. Si posterius, per se patet legatum esse restituendum. Si prius, videtur quidem

modum pro impleto habendum esse, et idem esse ac si reuera legatarius id fecisset, quod testator fieri voluit, sicque legatum non esse restituendum. In genere enim asserere solent DD. prout conditio, quae propter casum impleri nequit, pro impleta habenda: ita et modum, qui propter casum impleri nequit, pro impleto habendum esse. Vid. DVRANDVS *de cond. et mod. P. 5. C. 1.* LYNCKER *Dec. 556.* MEVIVS *Part. 8. Decif. 10.* et, ne sine lege loquantur, prouocare *ad L. 54. §. 2. et L. 92. §. 1. ff. de leg. 1.* Hoc principium vero, modum qui propter casum impleri nequit, pro impleto habendum esse, vniuersaliter verum non est, sed potius distinguendum est, an casus contingat ita, ut facto personae quis impendatur, ne testatori obtemperet: an vero potius alio modo contingat casus. In priori casu indistincte modus, qui propter casum impleri nequit, pro impleto habendus. In posteriori casu vero iterum distinguendum est, an euidenter probari possit, testatorem voluisse praecise modum impleri, et eo non impleto id quod relinquit, apud eum, cui relictum, manere nolle, an vero non: tum enim, si prius, non habetur modus pro impleto: etsi, si posterius, pro impleto habendus sit modus, qui propter casum impleri nequit.

nequit. Quum non huius loci sit theoriam doctrinae de modo, qui propter casum impleri nequit, pro impleto habendo, explicare: hanc propositionem sine ulteriori demonstratione hic adsumo, et tantum moneo, quod demonstratio eius, argumentando a conditione ad modum, fieri debeat. Quod vero quoad conditiones, quae propter casum impleri nequeant, ea, quae ego hic de modo dixi, valeant, ex iis, quae CRELLIVS in diss. sub titulo: *an conditio, quae propter casum impleri nequit, pro impleta habeatur*, docuit, facile constat. Quae cum ita sint, non possum non quum defendam, quod, si legato dotis constituendae relicto, modus, qui inest huic legato, propter casum, qui ex facto tertii contingit, impleri nequeat, eum pro impleto esse habendum: si vero non ita contingat hic casus, nec modum pro impleto haberi posse. Quod prius attinet, ex iis, quae iam dicta sunt, per se patet eius veritas. Quod vero posterius attinet, rationem huius asserti in eo pono, quod, quoties aliquid legatur eo fine, ut dos fiat, satis appareat testatorem noluisse legatum apud legatarium manere, nisi modus impleatur. Ut vero, quae dicta sunt, exemplo illustrem, pone Titium legare Seiae mille dotis nomine, certa persona, veluti

Sempro-

Sempronio, nominata, cum qua nuptiae ineundae. Quod si iam Seia quidem vellet cum Sempronio nuptias inire, et tum implere modum, Sempronius vero nollet: tum propter casum modus impleri non posset, aut propter talem casum, qui contingit ex facto Sempronii; hincque modus pro impleto esset habendus. Pone vero Sempronium iam mortuum esse, hincque etiam casu contingere modum impleri non posse, tum modus pro impleto non esset habendus: prout per expressam *L. 31. ff. de condit. et dem.* si Sempronio aliquid legatum, si Seiam duxerit, Seia vero mortua, deficit conditio, et legatum non debetur; si vero Seia viueret, aut nollet nubere Sempronio, cum ipse paratus esset, conditio non deficit, et legatum debetur, quasi impleta eius obsequio conditione. Confirmat etiam sententiam, quam defendo, ex parte, ipsa *L. 71. §. 3. ff. de condit. et dem.* in qua PAPINIANVS ait, quod, si Titius gener, cui fover centum dotis Seiae filiae nomine legauit, noliteam vxorem ducere, *causa legati, quod ad mulieris personam attinet, satisfactum intelligitur.*

#### §. XXXI.

Prout ex obligatione legatarii, cui legatum dotis constituendae relictum, fuit obligatio restituendi le-

di legatum, si modus non impletur in dictis casibus: ita ex hac obligatione iterum fuit obligatio cautionem de modo implendo praestandi, de qua iam paucis agendum est. Haec obligatio vero iterum non indistincte cuilibet legatario, cui legatum dotis constituendae relictum, incumbit: sed potius distinguendum, an legatarius eo tempore, quo legatum petit, iam in coniugio viuat, an vero non. In priori casu a praestatione huius cautionis est immunis: in posteriori vero eam praestare debet, nisi expressis verbis a testatore ei sit remissa. Cum enim in priori casu sine mora statim modus impleri possit, nec opus est cautione. Ast cum in posteriori casu non statim impleri possit modus adiectus, nec adest ratio cur legatarius in hoc legato a cautione, quae in genere a legatario, cui legatum modale relictum, praestanda, immunis esse debeat, nisi forsitan testator cautionem remiserit. Et ita etiam respondet PAPINIANVS in saepius iam excitata *L. 71. §. 5. ff. de cond. et dem.* verbis: *Sabinus autem existimabat, nupta muliere Titio, sine cautione legatum deberi, quoniam pecunia dotis efficeretur: sed cum ante nuptias, quia purum legatum est, peti potest, cautio, mulieri pecuniam reddi, necessaria erit.*

## §. XXXII.

Ex his, quae §. XXVII. seq. de iuribus et obligationibus legatarii, cui legatum dotis constituendae relictum est, dicta sunt, eius, qui hoc legato grauatus est, iura et obligationes per se fluunt. Iuribus enim legatarii respondent obligationes legato grauati: prout obligationibus legatarii respondent iura eius, qui hoc legato grauatus est. Vnde hic tantum de iis iuribus et obligationibus eius, qui hoc legato grauatus est, agendum, quae ex iis, quae in §§. *praec.* dicta sunt, per se non fluunt.

## §. XXXIII.

Ad talia iura talesque obligationes referri potest ius heredis etiam ab ipso legato dotis constituendae quartam Falcidiam detrahendi, si pauperi non relictum, et obligatio eam non detrahendi si pauperi relictum. In priori casu enim non, in posteriori vero omnino legatum dotis constituendae legatis ad pias causas est adnumerandum: *Vid. §. XXII.* legatum ad pias causas vero indistincte Falcidiae non subiacere noto notius est. *Non. 131. c. 12. Auth. similiter C. ad Legem Falcidiam.* Quod vero hic tantum loquar de eo casu, in quo vi priuilegii, ut aiunt, ipsius legati cessat Falcidia, vel me non monente quilibet videt.

## §. XXXIV.



## §. XXXIV.

Porro ad iura, de quibus loquor, pertinet ius heredis legatum dotis cum debito dotis compensandi, si testator, post dotem promissam, legatum dotis constituendae relinquit. Et si enim legatum in dubio non praesumatur animo compensandi relictum, sed potius legatarius et debitum et legatum petere possit: *L. 85. ff. de leg. 2. L. 6. Cod. de hered. instit.* sub his circumstantiis tamen oritur praesumptio in contrarium, quae ut fortior, elidit priorem, tanquam debiliorem. *Vid. L. 22. §. 3. ff. solut. matrimonio.* ~~MENOCHIVS de praesumptionibus Lib. 4. praef. 109.~~ Et ita etiam Illustris Ictorum ordo in hac Fridericiana respondit apud LVDEWIGIVM *Conf. Hall. Tom. 1. Conf. 99. pag. 239.*

## §. XXXV.

Progrèdior tandem ad iura et obligationes tertii, praeter legatarium et eum, qui hoc legato gravatus est, eius quoque iura et obligationes circa legatum dotis constituendae determinaturus. Est vero hoc loco duplex tertius considerandus, nimirum tam legatarii coniux, quam coheres, si forsan dos a patre praelegata sit. De priori hic, de posteriori vero *in §. seq.* agendum. Si itaque alicui legatum dotis constituendae relictum: eius coniux ius habet petendi hoc

legatum ab eo, qui hoc legato grauatus, non solum tum si actio cessa a legatario, sed ex si legatarius renunciasset, modo renunciatio non sit facta ante inita sponsalia. Quod facta cessione coniux legatarii dotem legatam petere possit, extra omne dubium positum est. Quod vero et tum, si a legatario facta renunciatio post inita sponsalia, legatum petere possit eius coniux, multis dubiis obnoxium esse fateor. Solum legatarius enim acquirere videtur ius petendi dotem sibi legatam, qui itaque cum iuri suo renunciare possit, facta renunciatione obligatio praestandi dotem legatam expirare videtur. Accedit auctoritas STRYKII qui in *diff. de iure mariti in bonis uxoris §. IX.* in aduersariorum castris pugnat, in casu quo dos promissa, cum quo casus, si dos legata, hoc respectu similis. At enim uero cum hoc legatum tendat in fauorem utriusque coniugis (§. XIV.): renunciatio fit in sponsi sponsaeue seu coniugis praeiudicium, nisi fiat ante sponsalia inita, hincque nec illa valere potest. Nec dici potest in hoc casu legatarium tantum suo iuri renunciare; cum potius simul iuri alterius renunciaret. Imo, sit ita, legatarium iuri suo renunciare: tamen haec renunciatio est inualida; cum renunciatio sui iuris sit inualida, si fit in tertii detrimentum. Vid. V. C. SCHNE-MANN in *diff. de renunciatione sui iuris inualida*, qui

qui ex instituto §. V. solidis argumentis euictum dedit, nec vxorem nec sponsam posse renunciare paternae successioni in praeiudicium mariti vel sponsi. Quidquid vero valet de renunciatione hereditatis, valet etiam multo magis de renunciatione legati dotis constituendae. Accedit quod iterum in *L. 71. §. 3. ff. de cond. et dem.* expresse constitutum sit, constante matrimonio, *etiam prohibente muliere*, Titio recte solui legatum dotis constituendae a patre relictum: nec obscure in sequentibus indicari, ipsam Seiam, quae est coniux Titii, qui proprie hic legatarius est (vid. §. VI.), ~~petitionem habere.~~ Additur tamen in dicta lege, quod si illa pecuniam dotis nomine legatam petat, neque eam dotis fieri velit, non dubie doli exceptione summoueri eam posse. Qua occasione oritur quaestio: *An, si legatarius, nec cedere vellet actionem coniugi, nec renunciare, sed potius sibi habere quod legatum est ut dos fiat, coniux possit contra coniugem agere?* Respondeo omnino. Debet enim legatarius modum implere, et coniugis interest eum impleri.

## §. XXXVI.

Postquam de coniugis legatarii circa legatum dotis constituendae iuribus et obligationibus actum: iam etiam paucis de iuribus coheredum legatarii, si forsan legatum dotis constituendae, ut praelegatum

relictum filiae, quae a patre cum reliquis liberis heres instituta, agendum. Recte enim iam monuit SCHILTERVS in *Exercit. ad ff. Exer. XXXIX §. LXXV.* dotem duplici modo praelegari posse: primo quoties puellae v.g. filiae, praeter partem suam hereditatis, certa summa loco dotis ita legatur, ut praecipuam illam habeat, quod legatrum paeceptionis vocant Romani, nos *Voraus.* Possè vero etiam dotem constitutam, et sibi solutam, vxori maritum legare, quod speciatim quoque dicitur praelegatio. Quod vero hic mihi de priori praelegati specie tantum sermo sit, per se patet. Quum vero filiae patri succedentes dotem conferre debeant, quaestio oritur: *An tum filia dotem conferre debeat, si a patre filiae legatum dotis constituendae, ut praelegatum, relictum est?* Me iudice, filia tunc ad dotem conferendam non est obligata. Cessat enim in genere collatio quando liberis quid praelegatum est *L. 39. §. 1. ff. fam. hercisc.* HERTIVS in *diff. de praelegatis §. 17.* MEVIVS *P. 1. decis. 84.* Cum vero quoad dotem a patre praelegatam, nec adsit specialis lex, per quam quoad hoc praelegatum speciale quid constitutum, nec etiam principium adsit, ex quo fluit exceptio quoad hoc praelegatum, hic in regula subsistendum est.

#### §. XXXVII.

Sequitur tandem ultimum huius dissertationis caput,

caput, huius legati amissionem concernens. Amittitur vero hoc legatum partim modis communibus, partim modis huic legato propriis. Modi communes amittendi legata tam noti sunt, ut de illis ne verbum quidem addendum esse censeam. Modos huic legato proprios vero quod attinet, ad eos refero, 1.) si ea, quae in testamento reliquit, testator postea viuis in dotem dederit *L. 11. C. de legatis* Conf. *STRUVIVS l. c.* 2.) si dos legata intuitu nuptiarum cum certa persona contrahendarum, eamque iam esse mortuam contingat (vid. §. XXX.). An vero etiam 3.) huc referri possit casus, si femina, cui hoc legatum relictum, monasterium ingreditur, sicque nuptiis temporalibus renunciat, *MENOCHIVS de praesumptionibus Lib. 4. praef. 148.* disquirat.

## §. XXXVIII.

Sic absolutis omnibus summis capitibus, ad quae tota de legato dotis constituendae doctrina redit, hic subsistendum esset. Subsisto itaque etiam hic, et tantum hoc unicum adhuc moneo, et legato dotis constituendae differre omnino legatum feminae relictum ad apparatus et instructum muliebrem, vulgo zur *Ausstattung, Aussteuer*. Differt enim omnino dos ab apparatu muliebri. Praeter alios bene multos, qui hanc differentiam exposuerunt, et ea, quae passim *ILL. ESTOR in diss. de apparatu et instructu nuptiarum*, monuit,

legi

legi etiam merentur, quae de hac differentia dixit STRVVIVS in der Sammlung und sachlichen Erklärung unterschiedener teutscher Wörter und Redensarten sub voce: Ausstattung, qui recte determinat differentiam inter dotem et apparatus muliebrem, dum ait: *Mitgift und Aussteuer ist nicht einerley; immaassen das Wort Aussteuer ein mehreres in Sich begreiffet, und auch diejenigen Ausgaben bezeichnet, welche wegen der Hochzeit an und aufgewendet worden, was nemlich zur Anschaffung des hochzeitlichen Schmucks, Kleidung und Hochzeits - Trachten, item zur Beschenckung des sogenannten Braut - Wagens an Leinen, Hausgeräth etc. employierts.* Licet vero haec legata differant omnino: tamen quae de legato dotis constituendae dicta sunt, mutatis mutandis, valent etiam de legato ad apparatus et instructum muliebrem: nisi quod ea, quae §. XXVIII. de tempore, quo legatum dotis constituendae peti potest, dicta sunt, hic locum non habeant; cum potius iam ante nuptiarum diem, sponsalibus tamen iam initis, hoc legatum sit praestandum. Solet enim apparatus et instructus muliebris post inita sponsalia, antequam nuptiae consummatae, comparari; hincque, quod legatum est ad apparatus muliebrem, post inita sponsalia, imminente nuptiarum die, licet nuptiae nondum sunt consummatae, est soluendum.

TANTVM.

CONSVL-

CONSULTISSIMO  
DN. DOCTORANDO

S. P. D.

PRAESES.

**E**x duplici ratione iam calamum arripio, TEque alloquor,  
CONS. DN. DOCTORANDE. Adscendis ad summos in  
utroque iure honores: abiturum paras ex nostra Academia  
in patriam. Duplex haec, quae contingit circa TE, mutatio,  
est id, quod continet duplicem, quae motus animum ad scriben-  
dum appella, ~~rationem.~~ Prius enim, TE nimirum honoribus  
Doctoralibus ornari, excitat letitiam. Posterius vero, TE ni-  
mirum iam vasa conclamare et iter parare in patriam, generat  
tristitiam. Vtrumque hunc affectum itaque, quem IV excitat,  
ut TIBI significem, est duplex ea ratio, quae motus, scribo.  
Desunt vero verba, deest charta, deest tempus ad utrumque sa-  
tis exprimendum. Tribus verbis itaque dicam, quae explicare  
non licet uberiori calamo. Honores, ad quos adscendis, TIBI  
gratulor ex animo, et fausta quaevis, quaevis felicia TIBI ap-  
precor. Abiturum, quem paras, doleo, et aegre ex amplexi-  
bus meis TE dimitto. Ast, cum ferenda sint, quae mutari ne-  
queunt, cum voto omnigenae prosperitatis tamen TE dimitto. Sis  
vero, quod oro rogoque, semper mei memor, nec permitte  
TE unquam capere mei oblivionem. Dabam  
Halae, d. XXX. Sept. MDCCL.

**S**ieh zu! mein Freund, bekriegte Feinde  
Verehren Dich anjet als Freunde,  
Es hat sie Dein Verdienst besiegt.

Fahr fort, besitz die Mäcenaten!

Mich reizt der Vorgang Deiner Thaten,  
Und Deine Gunst macht mich vergnügt.

**Gustav Carl von Dersig.**

aus Pommern. Opponens.

---

**S**ieß Völker sie mit Blei und Waffen,  
Gelehrter Freund, die Siege schaffen:  
Du siegest edler durch den Geist.

Dort gilt Gewalt: hier gelten Gründe;  
Drum eile, streite, überwinde  
So schön als dein Verdienst dich heist.

Wenn, Deinen Vorsatz zu erreichen,

Du mußt aus meinen Armen weichen:

So denck wie treu ich Dich verlohrt.

Doch lohnst Du auch wohl meine Triebe

Mit Deiner fernern Freundschafts-Liebe?

Dein edles Herz bürgt mir davor.

**Johann Friderich Schnelle**

aus Perleberg in der Prignitz. Opponens

---

**S**o willst Du denn mein Freund! anjet den Lorber zeigen,  
Den Du durch steten Fleiß Dir hast zu theil gemacht?

Ja! zeig nur jedermann: er ist mit Recht Dein eigen,

Dein stetiges Bemühen, hat ihn Dir zugebracht.

So gehst Du werther Freund! mit Deinem Sieges-Zeichen

Beglückt und hoffnungsvoll zu deiner Vater-Stadt;

Drum bitt ich, da Du jekt, so bald von mir willst weichen:

Denck an das Freundschafts-Band, so uns verknüpft hat.

**F. F. Müller,**

Susato. Westphalus Opponens.

\*\*\* (o) \*\*\*

Ap. 14. 70925